

Cunvegna tranter chantun Tessin e baselgias

Per in onn da scola cun istorgia religiosa neutrala

DA GUIU SOBIELA-CAANITZ

■ **En il Grischun vegn messa en dumonda l'instrucziun da talian en scolas primaras germanofonas. En tut las scolas dal chantun Tessin percunter emprend'ins «simplamain» franzos e tudestg; en dumonda però mettev'ins l'instrucziun religiosa confessiunala.**

La regenza chantunala ha gist cuntanschì sur da quai ina cunvegna cun las duas baselgias, la catolica e la reformada (oz respectivamain 68,9% e 4,3% da la populaziun). La lingia grossa sin la prima pagina dal «Corriere del Ticino» («CdT») dals 23 da november tuna: «Intesa storica sulla religione». L'artitgel di: «Las duas baselgias renconuschidas (...) èn prontas da renunziar a lur instrucziun confessiunala facultativa en 'quarta media' per lubir al chantun da porscher in'estrucziun istorica e culturala davart la religión» (p.12). Uvestg Valerio Lazzeri (Ligiaun) ha manegià verbalmain: «Si tratta di un compromesso ragionevole, il cui iter non è stato facile, ma che è stato portato avanti sul terreno di una preoccupazione condivisa, ossia che ci fosse per i ragazzi e le ragazze che frequentano la scuola ticinese un'offerta di insegnamento di taglio culturale sul fenomeno religioso.»

Schliaziun chantunala per duas baselgias

Uvestg Lazzeri, naschì a Dongio (Val dal Blegn) sco figl d'in miradur, sa preschenta sez gugent sco «Don Valerio». Sia devisa tuna: «Non impediatis musicam», invitaziun a na stenschentar l'inspiraziun.



Valerio Lazzeri, l'uvestg da Ligiaun. MAD

Sia vallada ha ina veglia tradiziun anticlericala («radicale») cun umans sco cusseglier dals chantuns Brenno Bertoni (1860–1945). «Non è stato facile» da cuntanscher ina cunvegna cun il chantun, perquai ch'ins ha tardivà onns ed onns tranter pliras schliaziuns. Gia il 2002 aveva deputada Laura Sadis (plr) giavischà «ch'ins dismettia l'ura confessiunala facultativa en favur d'ina instrucziun obligatorica d'istorgia da las religiuns». Il chantun ha sin quai fatg provas e lura «giavischà ina vasta maioritad per evitar conflicts.» La gasetta citescha cuss. gov. Manuele Bertoli (ps): Nus lain ussa pinar in messadi ch'il cussegl grond duaja lur analizar. L'instrucziun d'istorgia da las religiuns n'entschaiva betg avant set-

tember 2019.» Scolasta Eva Huhn, delegada da la baselgia reformada, ha commentà: «Finalmain vegn ins ad instruir lez rom. Gia 2003 era nossa sinoda sa pronunziada en quel senn.» Tiziana Zaninelli, scheffa da l'Uffizi chantunala da las «scuole medie», ha precisà: «Ussa stuain nus prevair ina valitaziun, perquai che lez rom vegn lura menziunà en l'attest da 'quarta media'» («CdT», p. 12). La gasetta catolica «Giornale del Popolo» (Massagno/TI) dals 24 da november rapporta: «Uvestg Lazzeri e delegada Huhn han engrazià a cuss. gov. Bertoli sco schef dal departament d'educaziun per sia avertadad da spiert; questa ha lubì da dialogar a moda constructiva e nizzaivla e da chattar ina schliaziun equilibrada.»

Tge confessiuns?

Ussa spetg'ins cun mirveglia da vesair il material che vegn lura duvrà per il rom nov. Quest duai regardar las confessiuns e religiuns preschentas en il chantun cun atgnas cuminanzas. La gasetta online per 2014 «Ticinonews» dals 24 da zercladur 2016, citond l'Uffizi federal da statistica, dat per 2014 la cifra da 5754 muslims: 2286 cun passaport svizzer, 248 da pajais da l'Uniun europeica, 2192 d'auters stadi europeics (cunzunt da l'anteriura Jugoslavia*), var 1000 dal rest dal mund. Era cristians ortodoxs vivan en il chantun, tranter auter da derivanza russa u serba e da baselgias «sirianas» (che pudesan provegnir da la Turchia). Ins duess pia savair dapli da la populaziun chantunala.

* **Bosnia-Erzegovina, Cosova, Macedonia, Montenegro, Serbia.**